

UNTUK SIARAN SEGERA



## PERSIDANGAN TVET ASEAN MENUTUP TIRAI DENGAN VISI TEGUH TERHADAP KEMAHIRAN MASA DEPAN

**KUALA LUMPUR, 15 Ogos 2025** – **Persidangan TVET ASEAN (ASEAN TVET)** berakhir semalam di Pusat Dagangan Dunia Kuala Lumpur, menutup dua hari perbincangan berprofil tinggi dan kerjasama serantau untuk memacu Pendidikan dan Latihan Teknikal dan Vokasional (TVET) sebagai pemangkin kepada peralihan digital dan hijau yang inklusif di seluruh ASEAN.

Anjuran bersama **Human Resource Development Corporation (HRD Corp)** dan **Perbadanan Tabung Pembangunan Kemahiran (PTPK)** yang merupakan agensi di bawah **Kementerian Sumber Manusia (KESUMA)**, persidangan ini membawa tema '**Memacu Transformasi Digital dan Hijau melalui Sistem TVET yang Inklusif serta Sedia Menghadapi Cabaran Masa Depan**', yang menekankan peranan penting TVET dalam memperengkap tenaga kerja rantau ini untuk ekonomi global yang berkembang pesat.

Berlangsung pada 13 – 14 Ogos 2025, ASEAN TVET menghimpunkan 25 penceramah pakar dan dihadiri kira-kira 1,500 perwakilan dari Negara-Negara Anggota ASEAN, termasuk pembuat dasar, pemimpin industri, penyedia pendidikan, pertubuhan pekerja dan rakan pembangunan antarabangsa.

**Ketua Eksekutif PTPK, Mohd Fathullah bin Mustafa**, menekankan dalam **Sesi Epilog: Hari Pertama** bahawa persidangan ini telah mengetengahkan idea-idea berani dan peluang besar untuk memperkukuh kerjasama serantau.

"ASEAN TVET bertujuan memperkukuh peranan TVET sebagai pemacu utama peralihan digital dan hijau yang inklusif di seluruh rantau ASEAN. Bagi mencapai matlamat ini, sistem TVET perlu mendorong inovasi bagi meningkatkan kualiti dan kesesuaian latihan, di samping memperkukuh keupayaan institusi TVET untuk memastikan akses yang adil dan saksama kepada kemahiran digital dan hijau masa depan untuk semua.

"Apa yang ingin kita capai melalui persidangan ini bukan sekadar sesi perbincangan, tetapi hasil yang boleh dilaksanakan, merangkumi satu set prinsip panduan untuk membantu Negara-Negara Anggota ASEAN membangunkan sistem TVET masa depan yang mengintegrasikan dimensi digital dan hijau, serta satu himpunan amalan

## UNTUK SIARAN SEGERA

terbaik yang didokumenkan bagi mewujudkan TVET berasaskan permintaan dan bersifat inklusif, termasuk mekanisme kerjasama antara kerajaan, institusi, industri dan tenaga kerja," katanya.

Sementara itu, ketika **Sesi Epilog: Hari Kedua**, Ketua Eksekutif HRD Corp, Dr. Syed Alwi bin Mohamed Sultan menekankan peranan TVET sebagai kunci dalam membentuk masa depan di samping mengukuhkan penyatuan ASEAN melalui visi bersama. Beliau menegaskan bahawa TVET bukan sekadar pilihan pendidikan, tetapi tulang belakang kepada kemajuan ekonomi dan kesejahteraan sosial ASEAN.

"TVET amat penting, ia mengurangkan pengangguran belia, memacu keusahawanan, mengukuhkan pertumbuhan PKS dan menjadi pemangkin keterangkuman sosial. Marilah kita semua membawa misi bersama untuk ASEAN dengan memperkasa rakyat melalui kemahiran dan memperkukuh rantau ini melalui TVET.

"Marilah kita meneruskan kerjasama sebagai satu rantau, mengukuhkan perkongsian dan bekerjasama rapat untuk memodenkan kurikulum, memperluas jaringan dengan industri, dan menjadikan TVET sebagai platform bertaraf tinggi," kata Dr. Syed Alwi menutup ucapan beliau.

Persidangan ini berakhir dengan acara penyampaian hadiah **Innovator Pitch Day: ASEAN Future-Makers Challenge 2025**, yang bertujuan menggalakkan penyertaan graduan TVET serta rakan industri untuk mempamerkan kemahiran teknikal di samping pemikiran keusahawanan dalam membangunkan penyelesaian praktikal dan berimpak kepada cabaran dunia sebenar. Daripada 58 penyertaan seluruh negara yang diterima bermula 1 hingga 30 Julai 2025 melalui laman web AYOS 2025, 20 finalis terbaik telah membentangkan inovasi mereka secara langsung kepada perwakilan dan juri.

Pemenangnya adalah seperti berikut:

- **Tempat Pertama:** Pusat Latihan Teknologi Tinggi (ADTEC) Jerantut, Pahang
- **Naib Johan:** Institut Proton (ADTEC Melaka)
- **Tempat Ketiga:** Sekolah Menengah Antarabangsa UUM Melaka

Pemenang dipilih oleh panel juri ternama yang terdiri daripada Dr. Hidayatullah Mohammad Ali, pensyarah dan penyelidik dalam bidang Kejuruteraan Kelestarian/Alam Sekitar dari Universiti Putra Malaysia (UPM); Dr. Nur Athirah Yusof, pensyarah dan penyelidik Bioteknologi dari Universiti Malaysia Sabah (UMS); dan Dr. Mohd Zieuddin Kufian, pensyarah dan penyelidik di Pusat Ionik, Universiti Malaya (CIUM) Kuala Lumpur.

## UNTUK SIARAN SEGERA

Melengkapkan sesi persidangan adalah **57 pempamer** yang mempamerkan inovasi tempatan, penyelesaian latihan dan teknologi yang mencerminkan keupayaan negara memacu Pembangunan kemahiran digital dan hijau.

Majlis perasmian ASEAN TVET yang diadakan pada hari pertama telah disempurnakan oleh **YAB Dato' Seri Dr. Ahmad Zahid bin Hamidi, Timbalan Perdana Menteri Malaysia, Menteri Kemajuan Desa dan Wilayah serta Pengerusi Majlis TVET Negara (MTVET)**, yang menekankan komitmen Malaysia untuk meletakkan TVET sebagai teras strategi pembangunan nasional dan serantau.

Turut hadir pada majlis perasmian ialah **YB Steven Sim Chee Keong, Menteri Sumber Manusia Malaysia**, yang menyeru agar kerjasama ASEAN diperkukuh bagi membina sistem kemahiran masa depan yang inklusif dan berpandukan kehendak industri.

ASEAN TVET merupakan platform perdana keempat di bawah AYOS 2025, yang diadakan bersempena Kepengerusian ASEAN 2025 oleh Malaysia. Menerusi platform perdana AYOS 2025 yang akan datang termasuk Persidangan & Pameran Modal Insan Kebangsaan (NHCCE), Forum Kemahiran Global (GSF) dan Forum Menteri-Menteri Tenaga Kerja ASEAN untuk Pembangunan Modal Insan (AFMM-HCD), Malaysia akan terus memacu agenda pembangunan modal insan yang bertujuan menggalakkan kerjasama berani, memperkukuh penglibatan industri dan mengintegrasikan kelestarian alam sekitar dalam sistem kemahiran.

Untuk maklumat lanjut mengenai AYOS 2025 dan platform perdana yang akan datang, sila layari [www.aseanyearofskills.org](http://www.aseanyearofskills.org).

**-Tamat-**

## **UNTUK SIARAN SEGERA**

### **Mengenai HRD Corp**

Human Resource Development Corporation (HRD Corp) merupakan agensi peneraju kerajaan Malaysia bagi pembangunan modal insan di bawah Kementerian Sumber Manusia (KESUMA).

Diurus selia oleh Akta Pembangunan Sumber Manusia Berhad 2001 (Akta PSMB 2001), HRD Corp bertanggungjawab terhadap kutipan serta pentadbiran levi pembangunan sumber manusia melalui Kumpulan Wang Pembangunan Sumber Manusia (KWPSM). Tanggungjawab ini merangkumi usaha menggalakkan latihan, latihan semula serta peningkatan kemahiran pekerja, perantis dan pelatih, untuk menyelaraskan keupayaan mereka dengan keperluan majikan serta aspirasi negara untuk membangunkan tenaga kerja berkemahiran tinggi. Usaha ini memastikan tenaga kerja Malaysia kekal berdaya saing di samping mampu menyesuaikan diri dengan tuntutan ekonomi semasa dan masa depan.

HRD Corp juga memainkan peranan penting dalam memperkukuh pasaran latihan di Malaysia, memacu inovasi, kualiti dan akses inklusif kepada pembangunan kemahiran di seluruh negara.

Untuk maklumat lanjut, sila layari [www.hrdcorp.gov.my](http://www.hrdcorp.gov.my)

### **Mengenai PTPK**

Perbadanan Tabung Pembangunan Kemahiran (PTPK) merupakan sebuah Badan Berkanun Persekutuan di bawah Kementerian Sumber Manusia yang ditubuhkan di bawah Akta Tabung Pembangunan Kemahiran 2004 (Akta 640) yang mula berkuatkuasa pada 1 Jun 2006.

Dasar dan hala tuju PTPK ditentukan oleh Lembaga Pengarah PTPK yang diterajui oleh mereka yang berpengalaman dan mahir dalam pelbagai latar belakang sama ada dari sektor Kerajaan, sektor swasta mahupun wakil Penyedia Latihan Kemahiran.

### **Fungsi Utama**

1. Menenal pasti dan meluluskan program latihan Kemahiran yang layak bagi pinjaman latihan kemahiran;
2. Mengadakan dan memberikan pinjaman latihan kemahiran dan bantuan kewangan selain pinjaman latihan kemahiran kepada pelatih, dan memberikan perkhidmatan dalam mentadbir, mengawas dan memungut pembayaran balik pinjaman; dan
3. Melaksanakan apa-apa fungsi lain yang diberikan kepada Perbadanan atau oleh mana-mana undang-undang bertulis lain.

Sebarang pertanyaan lanjut, sila layari laman sesawang PTPK di [www.ptpk.gov.my](http://www.ptpk.gov.my)